



Konkursā «Latgolys prozys skaitejumi 2025» uzvar Ligija Purinaša

«Latgolys prozys skaitejumi 2025» finalisti (nu kreisuos): Annele Slišāne (3. vīta), Ligija Purinaša (1. vīta), Valija Platace, Ivo Gilučs i Laura Strode (2. vīta)



Foto: Amanda Anusāne

Ituo goda suokumā izguoja Ligijis Purinašys dzejprozys kruojums «Magnificat». Tuo atkluošonys svātķi nūtyka Reigā – izdevnīceibys «Valodu māja» telpuos



Foto: Francis Belle

Inga Kaļva-Miņina

4. decembrī Lūznovys muižā nūtyka literaru konkursa “Latgolys prozys skaitejumi 2025” nūslāguma pasuokums. Itymā godā dorbys beja īsyutejuši 15 daleibņiki, bet konkursa žureja par lobuokajim izvierzeja sešus dorbys, nu kurim pīci izskanēja pasuokumā pošu autoru lasejumā. Par ituo goda konkursa, kura devize beja “Kai tev dzelys?”, uzvarātuoju kliva Ligija Purinaša ar romana “Sieviete” fragmentu.

Latgalīšu kulturyrs kusteiba «Volūda», sasadorbojūt ar festivalu «Prozas lasījumi», jau sastū reizi organizēja konkursu «Latgolys prozys skaitejumi». Juo mierķis ir veicynuot literarū procesu Latgolā i pamudynuot jaunū Latgolys kulturtelpai pīdareigu debitantu dorbū tapšonu. Augstuokū žurejis vieriejumu sajēme dzejneica i literaturkritike Ligija Purinaša, kura konkursā beja īsnāguse tūpūšuo romana «Sieviete» fragmentu. Ūtrū vītu īgiva Laura Strode ar dorbū «Lubuona valns», bet trešū – Annele Slišāne ar «Kuo tev īt?». Žurejis Atzineibys sajēme Valija Platace, Ivo Gilučs i Lilija Limane.

Konkursa uzvarātuoju dorbī byus publicāti latgalīšu kulturyrs ziņu portālā *lakuga.lv*, bet 1. vītys īgīvieja Ligija Purinaša 2026. godā varēs izmontuot desmit dīnys garu raksteišonys rezidenci Lūznovys muižā (ar apmokuotu uzaturiešonu rezidencē i stipendeju rodūšajam dorbam).

Konkursu «Latgolys prozys skaitejumi 2025» organizēja latgalīšu kulturyrs kusteiba «Volūda», tū atbolsta literaturys festivals «Prozas lasījumi 2025» (Latvejis Rakstņiku savīneiba), Valsts kulturkapitāla fonds, latgalīšu kulturyrs ziņu portāls *lakuga.lv*, žurnāls «Domuzīme», izdevnīceiba «Zvaigzne ABC» i Rēzeknis nūvoda Lūznovys muižā.

* * *

LIGIJA PURINAŠA atkluoj, ka itymā konkursā pīsada-leja pyrmū reizi i uzvara bejuse lels i nagaideits puorsteigums. «Munys attīceibys ar prozu ir dīzgon sarežģeitys – es tū narokstu, bet losu daudz lobpruotuok nakai dzeju,» soka Ligija. Paguojušajā godā jei sajēme Valsts kulturkapitāla rodūšū stipendeju romana raksteišonai, dorbū turpynuoja ari itymā godā. «Maņ tys leluokais vaicuojums vysod ir par volūdū. Izdūmovu, ka romanu raksteišu latvīšu literarajā volūdā, bet tod īguoja pruotā, ka varbyut vajadzātu ari latgaliski, – ka na vysu tekstu, tod kaidu daļu gon. Maņ cīši grybātūs, lai par Latgolys viesturi i kulturu vairuok cylvāku laseitu i zynuotu, i tys nūzeimej tū, ka tod dīmžāl ir juoupurej latgalīšu volūda, – cylvāki ir dīzgon slinki i nagryb laseit latgaliski. Šūbreid es dūmoju, kaidā volūdā tys romans eisti byus,» stuosta rakstneica.

«Maņ lykuos, ka «Latgolys prozys skaitejumi» ir loba īspieja īsyuteit romana fragmentu i nūskaidruot kompetentu cylvāku, kas ir naatkareigi eksperti, vīdūkli. Maņ tys sovā ziņā beja taidys risks, i es nagaideju, ka uzvariešu. Svareiguoki par uzvaru maņ beja nu žurejis sajimtī komentari par munu dorbū,» gūdeigi soka literaru konkursa uzvarātuoja.

Taipat jei atzeist, ka ar sovu daleibu konkursā «Latgolys prozys skaitejumi» jei gribēja īdvasmuot ari cytus daleibņikus īsyuteit sovus dorbys i debitēt, nasaverūt iz sovu godu skaitu, partū ka «munupruot, debitēt literatūrā nikod nav par vālu».

Svātdiņ, 7. decembrī, Ligija pīsada-leja festivala «Prozas lasījumi» nūslāguma pasuokumā Reigā, kur laseja sovu dorbū. «Tei beja loba i pījamūša sajiuta. Beja gon nadaudz baileigi, partū ka zālē beja i mani klausejuos ari taidi prozys meistari kai Svens Kuzmins, Osvalds Zebris, Jana Egle, bet kūpumā beja labi,» jei soka.

* * *

Runojūt par literaru konkursa «Latgolys prozys skaitejumi» cytu daleibņiku dorbim, kuri izskanēja pasuokumā, Ligija soka: «Kotrs autors dorbojās sovā žanrā, i daudzveideiba ir cīši svareiga, partū ka latgaliski vāga i fantazejis i fantastikys dorbys, bārnu literaturu i ari juteklisku i erotisku literaturu. Varbyut mums pīklyboj gramatika, bet tū jau var salobuot.» Ligija atguodoj, ka jei latgaliskajā kulturvīdē nūnuoce studeju laikā Daugovpilī, kod suoce dorbuotīs Latgolys Studentu centrā. Vāluok, jau studejūt Rēzeknis Augstškolā filologejis studeju programā, jei īsavuiceja latgalīšu rokstu volūdys gramatiku, pasateicūt lektorem Sandrai Ūdrei i Ilgai Šuplinskai.

«Asu cīši pateiceiga latgalīšu kulturyrs kusteibai «Volūda», ka jī ir uzajāmuši itū dorbū – veicynuot literarū procesu Latgolā. Bet mums byutu cīši juopīstruodoj, kab tei aktivitate volūdys i literaturys kūpšonā byutu daudz stypruoka. Ari pabraukojūt pa pasauli i pasaverūt, kas teik darāts cytu mozuok lītuotūs volūdū atteisteibā i nūturiešonā, saprūtu, ka mums pītryukst tūs cylvāku resursu i finansiejuma,» soka Ligija.

* * *



Par ituo goda konkursa, kura devize beja «Kai tev dzelys?», uzvarātuoju kliva Ligija Purinaša ar romana «Sieviete» fragmentu

Foto: Amanda Anusāne

Itymā godā izguoja Ligijis Purinašys dzejprozys kruojums «Magnificat» («Valodu māja»), kas ir juos trešuo gruomota. Nūsaukums «Magnificat» īt nu latīņu volūdā puorcalta slavynuojuma Jaunovai Marijai, atsasaucūt iz tekstūs izmontuotū lyugšonu stilistikū. Tei ir saplyudynuota ar dažaidom aktualom temom i spylgti pasaruoda na viņ tekstūs, bet ari muokslinīka Raivja Nikolajeva originalilustracejuos. Kruojumā teksti ir latvīšu literarajā i latgalīšu rokstu volūdā.

«Verūtīs nu taidys literaruos perspektivys, 2025. gods maņ ir bejs cīši veiksmiegs,» soka rakstneica, kura itymā godā izmiegīnuoja sovus spēkus ari kai tulkuotuoja. «Nu angļu volūdys tulkuoju Džilianys Andersonis gruomotu «Gribu», kuru izdeve izdevnīceiba «Helios». Tei ir savdabeiga gruomota – dažaidi sīvīšu pīredzis stuosti i bolsi. Džiliana Andersone ir apkūpuojuse viestulis, kuryš jai īsyuteja sīvītīs nu vysa pasaulā. Itei gruomota, munupruot, ir par vēlmi byut saprostai i mīlātai. Tei ir taida cīši konceptuala problema cylvāku attīceibu kontekstā, ari nave-seleigu attīceibu kontekstā. Gruomotu var izmontuot ari sovu partnerattīceibu uzlobuošonai, eipaši svareigi tū byutu izlaseit veirīšim, kab saprostu, kas tī sīvīšu golvuos nūteik,» stuosta Ligija Purinaša.

Dzejneica ir dzeivuojuose i struoduojuose rodūšajā rezidencē Nacionalajā rakstnīceibys centrā Velsā (Apvīnuotajā Karalistē), bejušuo Lelbritanejis premjerministra Džordža Loida pādeajā dzeivisvītā. Itei īspieja bejuse, pasateicūt platformai «Latvian Literature», kas mierktīceigi i veiksmiegi struodoj pi Latvejis literatu atpazeistameibys veicynuošonys Eiropā i pasaulī. Taipat jei ir bejuse ari Ventspilys rezidencē, kur dzeivuoja gon paguojušajā godā, gon ari treis nedelis itymā godā. «Romans, kuru rokstu, maņ ļuove tī īzapazeit ar cīši interesantim cylvākim, kurus piec tam satyku Igaunējā literarajā pasuokumā, i tod izaruodeja, ka mums ir daudz kūpeigu draugu. Tī kontakti, kas rezidencēs izaveidoj, ir iz ilgu laiku,» atzeist Ligija, kurai nuokamajā godā byus breineiga īspieja raksteit ari rezidencē Latgolā – Lūznovys muižā.

* * *

Kristīne Pokratniece, literaru konkursa «Latgolys prozys skaitejumi» koordinatore:

«Aizvadeiti jau sastī Latgolys prozys skaitejumi, i prīca, ka ir dīzgon daudz daleibņiku i aizvīņ vaira nu jim izavielej sovus dorbys raksteit taišni latgalīšu volūdā. Apsazynojam, ka latgaliski rokstūšus autoru nav daudz, tok kotru godu sajimtī dorbī dūd puorliceibu, ka konkursa reikuošona ir bejuse vārta. Juopikreit ari reiz īlzis Spergys saceitajam, ka itei ir breineiga īspieja sovu tekstu īdūt puorskaiteit nūzaris ekspertim, kuri var i grib skaiteit latgaliski. Tai kai asu konkursa koordinatore, atsaturu izceļt konkretus autorus i tekstus, tok īšķeji vysod ari deļ seve es atrīnu kaidu puorsteigumu i literarū prīcu.

Ka runoj par latgalīšu literaturys nuokūtni, es aizvīņ grybātu byut pozitivā i dūmoju, ka kotram laikam ir bejuši sovi raksteituoji i sovi skaiteituoji. Par spēiti vysaidom viesturiskom nūtikšonom voi attīksmei pret volūdū.

Juosoka lels paldis ari Lūznovys muižai, ar kuru izaveidojuse jau stabila sadarbeiba i paraksteits rezidenču sadarbības leigums ari nuokamajam godam. Deļtuo tikai logiski ruodejuos, ka ituo goda konkursa nūslāguma pasuokums i literarī dorbī izskanātu taišni muižys telpuos.»

«Projektu finansē Mediju atbalsta fonds no Latvijas valsts budžeta līdzekļiem». Par projekta raksta «Konkursā «Latgolys prozys skaitejumi 2025» uzvar Ligija Purinaša» saturu atbild SIA «Vietējā».

